

LLYWELYN SIÔN (1540 - 1615?), bardd, amaethwr, 'crier' neu ringyll mewn llys barn am gyfnod, a chopiwr proffesyddol wrth ei grefft, ac un o ffigurau pwysicaf bywyd llenyddol effro sir Forgannwg yn ail hanner yr 16eg ganrif

Enw: Llywelyn Siôn

Dyddiad geni: 1540

Dyddiad marw: 1615?

Rhyw: Gwryw

Galwedigaeth: bardd, amaethwr, 'crier' neu ringyll mewn llys barn am gyfnod, a chopiwr proffesyddol wrth ei grefft, ac un o ffigurau pwysicaf bywyd llenyddol effro sir Forgannwg

Maes gweithgaredd: Cyfraith; Llenyddiaeth ac Ysgrifennu; Natur ac Amaethyddiaeth; Barddoniaeth; Ysgolheictod ac Ieithoedd

Awdur: Thomas Oswald Phillips

Gŵr a hanoedd o Langewydd yn Nhrelales yn ymyl Penybont-ar-Ogwr. Mynnai '**Iolo Morganwg**' mai Llywelyn Siôn oedd yr athrylith a roes drefn a dosbarth ar 'Cyfrinach Beirdd Ynys Prydain' ac mai 'trwy ei fanyldeb a'i ddiwydrwydd y cynullwyd deunydd Cyfrinach y Beirdd' - y cwbl, wrth gwrs, yn ffugiad.

Fel copiwr proffesyddol mwyaf ei gyfnod yr haedda ei gydnabod; nid oedd yn gopiwr mor doreithiog â **John Jones** o'r Gellilyfdy neu **Robert Vaughan** o Hengwrt, ond y mae mwy o drefn a dosbarth yng nghynnwys ei lawysgrifau, heb ddim o fymwyon llythrennol ei gyfoeswyr. Y mae yn aros 13 o'i lawysgrifau - saith yn llawysgrifau o gywyddau ac awdlau, un casgliad o gwndidau, un llawysgrif achyddol, a phedair yn cynnwys testunau rhyddiaith. Ei gyfnod prysuraf fel copiwr oedd 1585-95; 1595-1600 ei oes aur; a 1600-13 a roes inni ei gyfraniadau pwysicaf, sef ei lyfrau hircul - 'Llyfr Hir Amwythig,' 'Llyfr Hir Llywarch Reynolds,' a 'Llyfr Hir Llanharan.' Trwy ei ddiwydrwydd y diogelwyd casgliadau pur gyflawn o farddoniaeth beirdd distadlaf Morgannwg yn hanner olaf yr 16eg ganrif ochr yn ochr â barddoniaeth rhanbarthau eraill Cymru. Yn ei law ef hefyd (Llanover MS. B 9) y ceir y casgliad cyflawnaf o gwndidau sy'n ffynhonnell ein gwybodaeth am hanes y cwndid a datblygiad y canu rhydd ym Morgannwg yn yr 16eg ganrif. Pwysig hefyd yw ei lawysgrifau o ryddiaith; ei gopi ef o'r 'Drych Cristnogawl' (**Gruffydd Roberts**) yw'r unig gopi cyflawn a orosodd yn cynnwys y tair rhan o'r 'Drych' (Singleton MS. 1, Caerdydd); yn Llanover MS. B 17 ceir testun o 'Chwedl Seith Doethon Rufain' sydd yn gwbl wahanol i'r naw testun arall a orosodd mewn llawysgrifau, ac yn ei ysgriflaw ef y mae'r unig gopi Cymraeg o'r 'Gesta Romanorum.' Yn ei lawysgrifau y ceir y darlun cyflawnaf o fywyd llenyddol byw ei gyfnod ym Morgannwg, a thrwy ei weithgarwch y rhoed ar gadw lawer o drysorau ein llên mewn cyfnod a oedd yn enwog am ei chwalu a'i ddiinstrio.

Awdur

Thomas Oswald Phillips

Ffynonellau

G. J. Williams, *Traddodiad Llenyddol Morgannwg* (1948), 79-90, 157-60, 177-8

G. J. Williams, *Iolo Morganwg a Chywyddau'r Ychwanegiad* (1926)

Darllen Pellach

Ethygl Wicipedia: [Llywelyn Siôn](#)

Dolenni Ychwanegol

Wikidata: [Q6662995](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/>

PDF Argraffu Cyfeirnod

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

frannu

Arddull APA

x

Phillips, T. O., (1953). LLYWELYN SIÔN (1540 - 1615?), bardd, amaethwr, 'crier' neu ringyll mewn llys barn am gyfnod, a chopiwr proffesyddol wrth ei grefft, ac un o ffigurau pwysicaf bywyd llenyddol effro sir Forgannwg yn ail hanner yr 16eg ganrif. Y *Bywgraffiadur Cymreig*. Adferwyd 11 Tac 2024, o <https://bywgraffiadur.cymru/article/c-LLYW-SIO-1540>

Copio'r
clipwrdd

LGC
NLW

LLYFRGEL
THE NATION



Yn ôl gŵyl
Llywodraeth Cymru
Supported by
Welsh Government